



# 增广 贤文

科普教育与艺术修养  
青苹果电子图书系列

# 增 广 贤 文

佚 名

# 增广贤文

佚 名

《增广贤文》可以说是旧时中国人人生的一本小小的百科全书。它几乎收集了士农工商、官宦平民各个阶层的人生处世格言，雅俗互见，尊卑杂糅，牴牾之处也时时可见。这正说明了它从不同角度、不同层次，反映了当时各类人的做人规范，使得这本书自清朝以来，家喻户晓，妇孺皆知，深深影响了中国人的整个人生。由于这个本子流传广泛，民间的增删修改，使得各种版本之间均有一定的差异。

昔时贤文，诲汝谆谆。

集韵增广，多见多闻。

观今宜鉴古，无古不成今。

知己知彼，将心比心。

酒逢知己饮，诗向会人吟。

相识满天下，知心能几人？

相逢好似初相识，到老终无怨恨心。

近水知鱼性，近山识鸟音。

易涨易退山溪水，易反易覆小人心。

运去金成铁，时来铁似金。

读书须用意，一字值千金。  
逢人且说三分话，未可全抛一片心。  
有意栽花花不发，无心插柳柳成荫。  
画虎画皮难画骨，知人知面不知心。  
钱财如粪土，仁义值千金。  
流水下滩非有意，白云出岫本无心。  
路遥知马力，事久见人心。  
马行无力皆因瘦，人不风流只为贫。  
饶人不是痴汉，痴汉不会饶人。  
是亲不是亲，非亲却是亲。  
美不美，乡中水；亲不亲，故乡人。  
相逢不饮空归去，洞口桃花也笑人。  
为人莫作亏心事，半夜敲门心不惊。  
当时若不登高望，谁知东流海洋深。  
两人一条心，有钱堪买金；  
一人一条心，无钱堪买针。  
莺花犹怕春光老，岂可教人枉度春。  
红粉佳人休便老，风流浪子莫教贫。  
黄金无假，阿魏无真。  
客来主不顾，应恐是痴人。  
贫居闹市无人问，富在深山有远亲。  
谁人背后无人说，哪个人前不说人。  
有钱道真语，无钱语不真。  
不信但看筵中酒，杯杯先劝有钱人。  
闹里有钱，静处安身。

来如风雨，去似微尘。  
长江后流催前浪，世上新人赶旧人。  
近水楼台先得月，向阳花木早逢春。  
古人不见今时月，今月曾经照古人。  
先到为君，后到为臣。  
莫道君行早，更有早行人。  
莫信直中直，须防仁不仁。  
山中有直树，世上无直人。  
自恨枝无叶，莫怨太阳倾。  
大家都是命，半点不由人。  
一年之计在于春，一日之计在于晨，  
一家之计在于和，一生之计在于勤。  
责人之心责己，恕己之心恕人。  
守口如瓶，防意如城。  
宁可人负我，切莫我负人。  
再三须重事，第一莫欺心。  
虎生犹可近，人毒不堪亲。  
来说是是非者，便是是非人。  
远水难救近火，远亲不如近邻。  
有钱有酒多兄弟，急难何曾见一人！  
人情似纸张张薄，世事如棋局局新。  
山中也有千年树，世上难逢百岁人。  
力弱休负重，言轻莫劝人。  
无钱休入众，遭难莫寻亲。  
平生莫作皱眉事，世上应无切齿人。

士乃国之宝，儒为席上珍。  
若要断酒法，醒眼看醉人。  
求人须求大丈夫，济人须济急时无。  
渴时一滴如甘露，醉后添杯不如无。  
久住令人嫌，频来亲也疏。  
酒中不语真君子，财上分明大丈夫。  
积金千两，不如多买经书。  
养子不教如养虎，养女不教如养猪。  
有田不耕仓廩虚，有书不读子孙愚。  
仓廩虚兮岁月乏，子孙愚兮礼义疏。  
同君一席话，胜读十年书。  
人不通古今，马牛如襟裾。  
茫茫四海人无数，哪个男儿是丈夫！  
白酒酿成缘好客，黄金散尽为收书。  
救人一命，胜造七级浮屠。  
城门失火，殃及池鱼。  
庭前生瑞草，好事不如无。  
欲求生富贵，须下死功夫。  
百年成之不足，一旦败之有余。  
人心似铁，官法如炉；  
善化不足，恶化有余。  
水太清则无鱼，人太察则无徒。  
知者减半，省者全无。  
在家由父，出嫁从夫。  
痴人畏妇，贤女敬夫。

是非终日有，不听自然无。  
宁可正而不足，不可邪而有余。  
宁可信其有，不可信其无。  
竹篱茅舍风光好，僧院道房终不如。  
命里有时终须有，命里无时莫强求。  
道院迎仙客，书堂隐相儒。  
庭栽栖凤竹，池养化龙鱼。  
结交须胜己，似我不如无。  
但看三五日，相见不如初。  
人情似水分高下，世事如云任卷舒。  
会说说都市，不会说屋里。  
磨刀恨不利，刀利伤人指。  
求财恨不多，财多害自己。  
知足常足，终身不辱；  
知止常止，终身不耻。  
有福伤财，无福伤己。  
差之毫厘，失之千里。  
若登高必自卑，若涉远必自迩。  
三思而行，再思可矣。  
使口不如自走，求人不如求己。  
小时是兄弟，长大各乡里。  
嫉财莫嫉食，怨生莫怨死。  
人见白头嗔，我见白头喜，  
多少少年亡，不到白头死。  
墙有缝，壁有耳。

好事不出门，恶事传千里。  
贼是小人，智过君子。  
君子固穷，小人穷斯滥矣。  
贫穷自在，富贵多忧。  
不以我为德，反以我为仇。  
宁可直中取，不向曲中求。  
人无远虑，必有近忧。  
知我者谓我心忧，不知我者谓我何求。  
晴天不肯去，直待雨淋头。  
成事莫说，覆水难收。  
是非只为多开口，烦恼皆因强出头。  
忍得一时之气，免得百日之忧。  
近来学得乌龟法，得缩头时且缩头。  
惧法朝朝乐，欺公日日忧。  
人生一世，草木一春。  
黑发不知勤学早，转眼便是白头翁。  
月过十五光明少，人到中年万事休。  
儿孙自有儿孙福，莫为儿孙作马牛。  
人生不满百，常怀千岁忧。  
今朝有酒今朝醉，明日愁来明日忧。  
路逢险处须回避，事到头来不自由。  
药能医假病，酒不解真愁。  
人贫不语，水平不流。  
一家养女百家求，一马不行百马忧。  
有花方酌酒，无月不登楼。



三杯通大道，一醉解千愁。  
深山毕竟藏猛虎，大海终须纳细流。  
惜花须检点，爱月不梳头。  
大抵选他肌骨好，不擦红粉也风流。  
受恩深处宜先退，得意浓时便可休；  
莫待是非来入耳，从前恩爱反成仇。  
留得五湖明月在，不愁无处下金钩。  
休别有鱼处，莫恋浅滩头；  
去时终须去，再三留不住。  
忍一句，息一怒；饶一着，退一步。  
三十不豪，四十不富，五十将衰寻子助。  
生不认魂，死不认尸。  
一寸光阴一寸金，寸金难买寸光阴。  
父母恩深终有别，夫妻义重也分离。  
人生似鸟同林宿，大限来时各自飞。  
人善被人欺，马善被人骑。  
人无横财不富，马无夜草不肥。  
人恶人怕天不怕，人善人欺天不欺；  
善恶到头终有报，只争来早与来迟。  
黄河尚有澄清日，岂可人无得运时！  
得宠思辱，居安思危。  
念念有如临敌日，心心常似过桥时。  
英雄行险道，富贵似花枝。  
人情莫道春光好，只怕秋来有冷时。  
送君千里，终须一别。

但将冷眼观螃蟹，看你横行到几时。  
见事莫说，问事不知；闲事不管，无事早归。  
假饶染就真红色，也被旁人说是非。  
善事可作，恶事莫为。  
许人一物，千金不移。  
龙生龙子，虎生虎儿。  
龙游浅水遭虾戏，虎落平阳被犬欺；  
一举首登龙虎榜，十年身到凤凰池。  
十载寒窗无人问，一举成名天下知。  
酒债寻常行处有，人生七十古来稀。  
养儿防老，积谷防饥。  
当家才知盐米贵，养子方知父母恩。  
常将有日思无日，莫把无时当有时。  
时来风送滕王阁，运去雷轰荐福碑。  
入门休问荣枯事，观看容颜便得知。  
官清司吏瘦，神灵庙祝肥。  
息却雷霆之怒，罢却虎狼之威。  
饶人算之本，输人算之机。  
好言难得，恶语易施；  
一言既出，驷马难追。  
道吾好者是吾贼，道吾恶者是吾师。  
路逢侠客须当避，不是才人莫献诗。  
三人行必有我师焉，  
择其善者而从之，其不善者而改之。  
欲倡和顺须为善，要振家声在读书。

少壮不努力，老大徒伤悲。  
人之善愿，天必佑之。  
莫饮卯时酒，昏昏醉倒酉；  
莫骂酉时妻，一夜受孤凄。  
种麻得麻，种豆得豆。  
天网恢恢，疏而不漏。  
见官莫向前，做客莫在后。  
宁添一斗，莫添一口。  
螳螂捕蝉，岂知黄雀在后。  
不求金玉重重贵，但愿儿孙个个贤。  
一日夫妻，百世姻缘。  
百世修来同船渡，千世修来共枕眠。  
杀人一万，自损三千。  
伤人一语，利如刀割。  
枯木逢春犹再发，人无二度再少年。  
未晚先投宿，鸡鸣早看天。  
将相头上堪走马，公侯肚内好撑船。  
富人思来年，穷人思眼前。  
世上若要人情好，赊去货物莫取钱。  
死生有命，富贵在天。  
击石原有火，不击乃无烟。  
为学始知道，不学亦徒然。  
莫笑他人老，终须还到老。  
和得邻里好，犹如拾片宝；  
但能依本分，终须无烦恼。

大家做事寻常，小家做事慌张。  
大家礼义教子弟，小家凶恶训儿郎。  
君子爱财，取之有道；贞妇爱色，纳之以礼。  
善有善报，恶有恶报，不是不报，日子未到。  
万恶淫为首，百行孝当先。  
人而无信，不知其可也。  
一人道虚，千人传实。  
凡事要好，须问三老。  
若争小可，便失大道。  
家中不和邻里欺，邻里不和说是非。  
年年防饥，夜夜防盗。  
好学者如禾如稻，不好学者如蒿如草。  
遇饮酒时须饮酒，得高歌处且高歌。  
因风吹火，用力不多。  
不因渔父引，怎得见波涛。  
无求到处人情好，不饮任他酒价高。  
知事少时烦恼少，识人多处是非多。  
世间好话书说尽，天下名山僧占多。  
入山不怕伤人虎，只怕人情两面刀。  
强中更有强中手，恶人终受恶人磨。  
会使不在家豪富，风流不在着衣多。  
光阴似箭，日月如梭。  
天时不如地利，地利不如人和。  
黄金未为贵，安乐值钱多。  
万般皆下品，唯有读书高。

为善最乐，为恶难逃。  
羊有跪乳之恩，鸦有反哺之义。  
孝顺还生孝顺子，忤逆还生忤逆凶；  
不信但看檐前水，点点滴在旧窝池。  
隐恶扬善，执其两端。  
妻贤夫祸少，子孝父心宽。  
人生知足何时足，到老偷闲且是闲。  
但有绿杨堪系马，处处有路通长安。  
既堕釜甑，反顾何益？  
反覆之水，收之实难。  
见者易，学者难。  
莫将容易得，便作等闲看。  
用心计较般般错，退步思量事事宽。  
道路各别，养家一般。  
从俭入奢易，由奢返俭难。  
知音说与知音听，不是知音莫与弹。  
点石化成金，人心犹未足。  
信了肚，卖了屋。  
谁人不爱子孙贤，谁人不爱千钟粟，  
奈五行，不是这般题目。  
莫把真心空计较，儿孙自有儿孙福。  
天下无不是的父母，世上最难得者兄弟。  
与人不和，劝人养鹅。  
与人不睦，劝人架屋。  
但行好事，莫问前程。

不交僧道，便是好人。  
河狭水激，人急计生。  
明知山有虎，莫向虎山行。  
路不铲不平，事不为不成。  
人不劝不善，钟不敲不鸣。  
无钱方断酒，临老始看经。  
点塔七层，不如暗处一灯。  
堂上二老是活佛，何用云山朝世尊。  
万事劝人休瞞昧，举头三尺有神明。  
但存方寸土，留与子孙耕。  
灭却心头火，剔起佛前灯。  
惺惺常不足，蒙蒙作公卿。  
众星朗朗，不如孤月独明。  
兄弟相害，不如友生。  
合理可作，小利莫争。  
牡丹花好空入目，枣花虽小结实成。  
欺老莫欺少，欺少心不明。  
随分耕锄收地利，他时饱满谢苍天。  
得忍且忍，得耐且耐，不忍不耐，小事成大。  
相论逞英雄，家计渐渐退。  
贤妇令夫贵，恶妇令夫败。  
一人有庆，兆民咸赖。  
人老心不老，人穷志不穷。  
人无千日好，花无百日红。  
杀人可恕，情理难容。

乍富不知新受用，乍贫难改旧家风。  
座上客常满，杯中酒不空。  
屋漏更遭连阴雨，行船又遇打头风。  
笋因落箨方成竹，鱼为奔波始化龙。  
曾记少年骑竹马，看看又是白头翁。  
礼义生于富足，盗贼出于贫穷。  
天上众星皆拱北，世间无水不朝东。  
君子安贫，达人知命。  
良药苦口利于病，忠言逆耳利于行。  
顺天者存，逆天者亡。  
人为财死，鸟为食亡。  
夫妻相好合，琴瑟与笙簧。  
有儿贫不久，无子富不长。  
善必寿考，恶必早亡。  
爽口食多偏作病，快心事过恐生殃。  
富贵定要依本分，贫穷不须枉思量。  
画水无鱼空作浪，绣花虽好不闻香。  
贪他一斗米，失却半年粮；  
争他一脚豚，反失一肘羊。  
龙归晚洞云犹湿，麝过青山草木香。  
平生只会说人短，何不回头把己量。  
见善如不及，见恶如探汤。  
人穷志短，马瘦毛长。  
自家心里急，他人不知忙。  
贫无达士将金赠，病有高人说药方。

触来莫与竞，事过心头凉。  
秋至满山多秀色，春来无处不花香。  
凡人不可貌相，海水不可斗量。  
清清之水为土所防，济济之士为酒所伤。  
蒿草之下或有兰香，茅茨之屋或有公王，  
无限朱门生饿殍，几多白屋出公卿。  
醉后乾坤大，壶中日月长。  
万事皆已定，浮生空自忙。  
千里送毫毛，礼轻仁义重。  
世事明如镜，前程暗似漆。  
架上碗儿轮流转，媳妇自有做婆时。  
人生一世，如驹过隙。  
良田万顷，日食三升；大厦千间，夜眠八尺。  
千经万典，孝义为先。  
一字入公门，九牛拖不出。  
八字衙门向南开，有理无钱莫进来。  
富从升合起，贫困不算来。  
万事不由人计较，一生都是命安排。  
家无读书子，官从何处来？  
人间私语，天闻如雷；暗室亏心，神目如电。  
一毫之恶，劝人莫作；一毫之善，与人方便。  
欺人是祸，饶人是福；  
天眼昭昭，报应甚速。  
圣贤言语，神钦鬼服。  
人各有心，心各有见。



口说不如身逢，耳闻不如眼见。  
养兵千日，用兵一时。  
国清才子贵，家富小儿骄。  
利剑割体伤犹合，恶语伤人恨不消。  
有钱堪出众，无衣懒出门。  
公道世间唯白发，贵人头上不曾饶。  
为官须作相，及第必争先。  
苗从地发，树由枝分。  
父子亲而家不退，兄弟和而家不分。  
官有公法，民有私约。  
闲时不烧香，急时抱佛脚。  
幸生太平无事日，恐逢年老不多时。  
国乱思良将，家贫思贤妻。  
池塘积水须防旱，田土深耕足养家。  
根深不怕风摇动，树正何愁日影斜。  
学在一人之下，用在万人之上。  
一字为师，终身如父；  
忘恩负义，禽兽之徒。  
劝君莫将油炒菜，留与儿孙夜读书。  
书中自有千钟粟，书中自有颜如玉。  
莫怨天来莫怨人，五行八字命生成。  
莫怨自己穷，穷要穷得干净；  
莫羡他人富，富要富得清高。  
别人骑马我骑驴，仔细思量我不如；  
等我回头看，还有挑脚汉。

路上有饥人，家中有剩饭；  
积德与儿孙，要广行方便。  
作善鬼神钦，作恶遭天谴。  
积钱积谷不如积德，买田买地不如买书。  
一日春工十日粮，十日春工半年粮。  
疏懒人没吃，勤俭粮满仓。  
人亲财不亲，财利要分清。  
十分伶俐使七分，常留三分与儿孙；  
若使十分都使尽，远在儿孙近在身。  
君子乐得做君子，小人枉自做小人。  
好学者则庶民之子为公卿，  
不好学者则公卿之子为庶民。  
惜钱莫教子，护短莫从师。  
记得旧文章，便是新举子。  
人在家中坐，祸从天上落；  
但求心无愧，不怕有后灾。  
只有和气去迎人，哪有相打得太平？  
忠厚自有忠厚报，豪强一定受官刑。  
人到公门正好修，留些阴德在后头。  
为人何必争高下，一旦无命万事休。  
山高不算高，人心比天高；  
白水变酒卖，还嫌猪无糟。  
贫寒休要怨，富贵不须骄；  
善恶随人作，祸福自己招。  
奉劝君子，各宜守己，  
只此呈示，万无一失。